

Delegada federala per la plurilinguitad

■ (gsc) **Il 10 d'avrigl 2013, sin proposta da cuss. fed. Widmer-Schlumpf, ha il Cussegl federal elegì Nicoletta Mariolini, burgaisa e suprastanta municipala da Lugano, delegada federala per la plurilinguitad davent dals 1. d'avust 2013, confurm a la lescha federala da linguas.** Mariolini è naschida 1964 en ina famiglia che derivava da la provinza lumbarda da Brescia. Suenter la matura a Lugano ha la giuvna studegià economia publica a l'Universitad da Losanna, sa specialisond en dumondas socialas e sanitaras. Lur ha'la lavurà en quella universitad e per instituziuns socialas vadaisas. 1992-1993 è'la sa perfecziunada a la «City University of New York». 1998-2004 er'la responsabla per la tgira da chasa en il chantun Vad. L'onn 2004 l'ha il pievel da Lugano elegì ella sco candidata da la ps en la regenza communal, nua ch'ella s'occupa cun las scolas e maina il departamaint d'integraziun sociala. Dapi sis onns fa'la part dal cussegl grond tessinai. La comunicaziun uffiziala dals 10 d'avrigl punctuescha: «Decisiva per il cussegl federal era t. a. (...) la lunga activitad professiunala da Nicoletta Mariolini en Romandia ed en la Svizra italoфона. Grazia a sia experientscha (...) enconusch'la

fitg bain la moda da lavurar ed il funcziunament da l'administraziun, dals executivs e da las associaziuns.» Il magazin «L'Hebdo» (Losanna) dals 18 d'avrigl commentescha: «En il Cussegl da citad da Lugano ha Mariolini stuì emprendre da collavurar cun Giuliano Bignasca, l'agitatur da la Lega, mort dacurt.» Cuss. naz. Marina Carobbio (TI/ps), viceparsura dal ps svizzer, accentuescha: «Sco dunna e sco socialdemocrata en il Tessin ha Nicoletta Mariolini demussà da savair sa profilar. Segir vegn'la a meglierar la situaziun da las minoritads en l'administraziun federala ed a rinforzar la coesiun naziunala.» Cuss. naz. Marco Romano (TI/pcd) manegia: «En ils uffizis e departaments vegn ins a respectar la ferma personalitad da Mariolini sch'ins cunterfa a la lescha federala da linguas.» Ella resta dentant prudenta davart sia strategia (...): «Jau vi esser qua per uffizis e regiuns, per chapir meglier las bloccadas internas d'oz.» Per charmalar meglier Romands, Tessinai [e Grischuns latins] a Berna, punctuesch'la ch'i veglia masiras d'accumpagnament, per exempel areguard la lavur a distanza. Ella vul lavurar in di da l'emna a Lugano».